



18. november 2020

UKA 2020/35

Atassut

Bentiaraq Bendtsen Ottosen

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaanngortillugit, kræfteqarlutik nappaateqarnertik ilutigalugu katsorsagassanngoraangamik naliginnarmik akissarsionertik unikkallaraangat sulisinnaajunnarnertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnersoq aammalu qanoq ikiortarialiunersut taamatut pisinnaatitaaffilissapata. Nalunaarusiaq UKA2021-mi saqqummiunneqassaaq.

(Inatsisartunut ilaasortaq, Erik Jensen, Siumut)

Katsorsartittut toqqissillutik peqqinnissaqarfimmi sullinneqartariaqarput. Peqqinnissaqarfik ilisimavarput angummanneq ajuleqqasoq, taamaattumik isumaqarpunga peqqinnissaqarfik pillugu nutaamik nunatsinni periusissiamik sulisoqartariaqalersoq.

Peqqissiniarluta nakorsiartarpugut, aatsaalli ajortoqavitsillugu peqqinnissaqarfimmut saaffiginnittarneq Atassummiit piaartumik qaangerneqarnissaa anguniarparput. Peqqinnissaqarfimmi sulisut tamakkiisumik suligaluarlutik angummanneq ajulertartut ilisimavarput, tamanna sukkasuumik qaangerneqassapat isumaqarpugut peqqinnissaqarfitta aaqqissuusaanera allanngorluinnartariaqalersoq.

Atassummiit pingaartipparput inuk qitiutillugu kiffartuussisoqartassasoq imaangitsoq inuk inatsisitigut agguluttumik sullinneqassasasoq, inatsilli tamakkiisut peqatigalugit inuk illersorneqassaaq. Pissusissamisuungilaq katsorsartittoq pigisani nalillit tamaasa akigeriarlugit nunatta avataanut katsorsartinnini ingerlateqqissagaa, tamanna Atassummiit isiginngitsuusaaginnarneqarsinnaanngitsutut isumaqarpugut inuiaqatigiini isigineqartariaqartoq.

Atassummiit pingaartipparput inuit ikiortariallit ikiorserneqartarnissaat, taamaattumik siunnersuuteqartup siunnersuutaa ilalerparput. Soorunalimi inuk napparsimasoq pisortani ikiorserneqarnissaa pingaaruteqarpoq, inuk inatsisitigut agguluttumik suliarineqannginnissaa anguneqartariaqarmat.

Nunatta avataanut katsorsartikkiartortarneq imaanaasanngilaq, pisulli politikikkut eqqumaffigineqarnerusariaqartoq isumaqarpunga. Uani kræftertut kisimi pineqassanngillat, nunattali iluani katsorsartissinnaanngitsut aamma pineqarsinnaasut eqqumaffigineqassaaq.

Siunnersuut taperserparput Ataatsimiititaliamullu susassaqartumut innersuullugu.